


柳下集射



柳下集卷之五

南陽 洪世泰道長 著

詩

社稷神室因雨漏修改余承 命差祭猥從執
事之列卽事有述仍示洪佐郎道陳

社稷邦爲本山川地亦靈圜壇一片白古栢萬株青
沴氣朝收雨神光夜見星不徒牲幣盛 王德卽惟
馨

其二

積雨傷多漏明宮告載修 御香薰靜夜靈氣肅新

秋星月俱高
暎溪泉各細流
有詩歌后稷
家國慶同休

其三

執事祇承
命微官忝末行
吸來金掌露
分得玉爐香
卜地祥圖啓
祈天寶曆長
仰瞻黃道日
晴後更晶光

罷官

清時澄汰合
微官通禮功名興
亦闌青女莫誇霜力
勁我如松栢本無寒

其二

黃花笑我解官遲酒熟花前可一卮榮辱不關身外
事鬼神難奪腹中詩

武溪

白髮秋風裏狂歌山菊前人間少平地郭外有長天
石老頑如我松高儼若仙清泉一萬斛塵骨洗餘羶
重陽日有感

蕭瑟悲秋興行吟黃葉中菊花何意笑顛倒向西風
步月

露下空庭槐葉疎蒼山寥落此閑居幽人獨步當深
夜明月高懸在太虛地僻何妨依草木年衰不敢廢

詩書枯桐絕意登清廟莫放奇音出爨餘

訪重興寺

塵區眇何隘不足放余步褰裳一出城得彼無盡路
迢迢白雲峰目極歸鳥處終須昇絕頂但逐白雲去
示李台老

老夫罷官深閉關故人招我清潭間身邊豈復有白
簡眼底不可無青山濁醪下馬且小酌寒菊向人猶
好顏前路何須問樵子側耳已覺來潺湲

清潭精舍

三角峰高劍插青深秋空峽氣泠泠蒼崖赤葉留餘

照哀壑幽泉落遠聽人得慧心方作佛地無凡草卽
爲靈北庵禪客雙眉雪愛爾長年臥翠屏

重興寺謹次徐相公韻

古寺秋仍盡蕭條只數僧昔來何歲月猶記佛前燈
文殊寺

太古山根裂靈泉窟底通佛光懸日月庵影掛虛空
遙海平臨盡孤峰宴坐同九衢鍾鼓急車馬暮塵中
自文殊步下緣溪水石甚佳處處可坐

山遊意不盡却恨下山忙落日催人短連峰送客長
水清皆見石楓老半凋霜出谷還堪坐平巖列酒觴

野興

翳翳草間菊無人空自香
西風吹不盡白日照餘光
敢恨捐中野猶能冠衆芳
山家別有採蒼耳欲盈筐

暝色

暝色侵孤樹西岑尚半明
棲鴉纔定意落葉稍連聲
靜得三秋氣冥觀萬物情
聽鶯如昨日溪柳綠初生

孟冬

老子臥深門不開盈庭敗葉與荒苔
孟冬日就西南轉薄暮風翻天地來
身似秦人常欲隱文非楚客自生哀
竊聞側席求賢急經濟誰爲管樂才

夜坐

霜高星白廓寒天
山閣懸燈坐悄然
萬事傷心今域內
三冬閉戶此溪邊
黃圖日月昏無象
滄海鯨鯢動有年
却恐老來摧志氣
試從隣客借龍泉

枕上

至後寒暄半微曦
不肯舒滿城紛噬
嗑高枕一華胥
鵲噪知人過窻明
見雪餘莫嗔孫學
懶翁自誤詩書

送東翁

呦呦野中鹿食草
相戲逐不如枝上
蟬風露以充腹
丈夫不自謀何用
萬卷讀從人且爲
生未遑安室屋

葛屨犯冬寒東走雪山麓林棲共數子朝夕霑晝粥
朱門曳綺縠餘粟飽鰕鶩嗟哉自古然鮑焦甘抱木

其二

遲遲出東門顧瞻戀城闕緬彼五噫歌高咏頗愁絕
種稻野田中稂莠何揭揭培覆既失宜秋穫詎能實
飄飄似離子荒歲有相失老鴈號空澤北風吹雨雪
五馬從何來軒蓋耀朝日相逢不相顧流影去滅沒
次趙甥韻

萬物歸根盡吾今守此廬方看八蜡祭更欲一年除
地氣深吹雪窗光靜在書勸君須努力有志不爲虛

春意 辛卯

雪盡溪南見草芽東風還入此山家
獨憐老樹生春意半死枝頭更欲花

佚老堂次韻

公住溪南我北山緣流信步路非艱
雲晴午色何多媚木老春容也不頑
爇裏飯香留且坐尊前詩就許
方還九街塵土深如海誰識中藏此地閑

閑步到西崦

興來聊獨往今日得吾身
落落無心客茫茫滿眼春
孤雲亦何意百鳥也相親
漸欲交遊改休詩覓酒人

追悼妙軒

昔在論文日淵翁亦許君孤懸元一歲鼎峙卽三分
往事歸秋草餘生泣暮雲唯應玄晏序百代永公聞
閑居遣興錄呈佚老堂

昨日今日皆春陰幽齋睡起門巷深杏花欲動自可
悅溪水橫流那得禁貧居食寒亦佳節老子踏青猶
豪心君家酒熟肯同飲我有新詩須醉吟

其二

夜雨東溪水沒沙柴門老柳亦韶華閑來睡思和禽
語老去風情在杏花日月故饒無事客芳菲偏着近

山家論詩每赴南隣約步慣橋頭一路斜

與鄭潤卿諸人遊三清古壇

少年來往此溪涯好是三清太乙家
壇毀不曾留片石井枯猶有伏殘砂
冥冥欲雨千峰氣寂寂餘春一樹花
淨界却爲塵客汚婆娑歌在弄韶華

時有惡少
輩遊耍

其二

西山移約北山臺隨後雙童挈酒罍
芳草引人佳處去蒼松笑我白頭來
水流花發知何意雨暗雲低坐不迴
車馬滿城塵土裏獨容吾輩此徘徊

向晚冒雨歸到柳下亭仍留潤卿同宿用星字

賦

山雨驅人到柳亭杏花如雪落盈庭柴門客語翻雙
鵲樹杪雲移出數星酒盡更謀滄老酌詩成却與潤
卿聽殘生可惜唯光景我昔兒童兩髭青

和潤卿留題二絕

今夜留君不放迴杏花一樹酒三杯卽教酒盡能沽
取且未花飛可復來

其二

朝來送客出柴門雨濕春山尚半昏獨步空庭三遶
樹殘花老子兩無言

奉送趙叅議令公使日本

玉節星馳萬里長
東南天地海茫茫
使華必用無雙士
隣好重修日本王

其二

雲帆初發永嘉臺
日湧扶桑曙色開
天外有山青半出
勢如飛馬踏空來

其三

一歧東連藍島長
赤間關下住飛艖
雲愁海思天皇廟
畫壁中開古戰場

其四

大洋舟過赤間關千里帆風滅沒間四面向來唯有
海一邊從此始看山

其五

金欄漆舫上層樓哀唱黃衣立兩頭夾岸爭觀人似
束半騎墻屋半乘舟

其六

魚鱗板屋竹爲籬黃綠交枝橘柚垂恠爾田家亦風
致室中皆貯一蛾眉

其七

琵琶湖水學琵琶上有西風黃菊花白鴈北來渠亦

客海濱隨處宿蠻沙

其八

龍泉顏色白如霜雙挿腰間有短長
睚眦殺人何太勇薩摩州客最難當

其九

徐市詩書獨漏秦全經猶說此傳真
祇今更慕箕風化漸學文章欲作人

其十

蓬萊何在海中央不老曾聞異草香
今日吾王方有疾採歸先與太醫嘗

其十一

君欲行時我欲留
驪歌一曲漢南舟
此心却與江流去
東繞扶桑六十州

送李重叔充製述官徃日本

尊前握手卽天涯
此去東溟萬里槎
列島盡開蠻子窟
三山或見羽人家
鯨鯢帖息承王命
星斗低回避國華
最好殊方傳美事
爭言上价是侯芭

寄日本野鶴山

蓬海仙槎一夢還
日東消息杳茫間
不知萬里今何似
似三十年來野鶴山

其二

東使今年又聘隣
試看滄海未生塵
白鬚丹頰洪厓子
盡裏曾爲少壯人

其三

一別音書不復通
此生無那馬牛風
相思却似扶桑日
纔落西來復出東

雨後望冠岳山

積雨洗天去迢迢
江外山幽人不曾
出隱几一窻間
雨後聽蟬有感寄李生

積雨生秋氣
今年又聽蟬
閑愁隨白髮
散步得青天

病起涼風後心收暮景前
新知李處士從汝可歸田
清潭洞與鄭惠卿用閑字同賦

入谷不知路行穿蘿薜間
依然得古寺忽已到深山
楓色生秋早峰陰在水閑
方知佛所宅雲霧作玄關
弄月軒

客臥高樓終夜開
仰看秋漢白昭回
泉從絕壁斜邊落
月出危峰缺處來
下界應知皆火宅
諸天別有此雲臺
獨憐桂樹花如雪
山鬼幽吟萬壑哀

朝起與惠卿用明字同賦

萬象歸朝澈秋山雨洗明
一樓常水響高頂忽雲生

採藥先分餌窮源又欲行隣庵彼誰子隔樹讀書聲

西巖

深峽晴交雨蒼崖背夕陽濯衣爭水白披髮受風涼
峰出常當眼雲移只在傍居人不解賞山木自秋光

其二

落日窺潭影危巖兀坐臨流雲一半雨偃木百重陰
徑絕猶樵跡庵空自佛心居然欲出世吾愛此山深
靈臺庵

孤庵倚北崖前對仁壽峰自從居士去不復聞夜鍾
畫佛但在壁歲久苔塵封客來一怙悵鼯鼠落高松

其二

諸天本不住去來一過客虛庵闔已閉苔逕亦無跡
獨有舊遊人時到撫庭栢泠泠幽澗泉流響自朝夕
潭上夜坐

潭上風雷接杳冥夜深人語有龍聽洞天悄悄微昇
月山木深深遠度螢自斷此生歸白社誰知一謫坐
黃庭詩成不敢題蒼壁寂寞幽懷感岳靈

贈惠卿

君爲白石我蒼松閱盡風霜不改容擺却世間多少
累一生同臥此西峰

晨起

山夜未能寢晨起倚虛幌孤月旣西歸百泉猶自響
境落何幽絕心目極寥朗高咏秋水篇窅然絕塵想
仰視白雲峰壁立幾千丈嗟我不如君有此好氣象
可望不可攀焉得凌風上

清潭歌

三角之峰何崒兀白雲仁壽最奇拔山根有泉來太
古厥源泡泡自北出雙流直下決兩峽壁立川回水
爲一激之爲瀑泓爲潭巨石橫亘玉蘄巖上有飛閣
樹杪懸崢嶸北對靈臺庵是時秋霖洗寥廓坐臨百

泉爭一壑蒼崖衆木垂積陰白日風雷鬱噴薄向來
塵土喝死人無限清波一疏濯林深不覺山月昇噴
影微看水中落笑呼二子指明月月色潭光相照澈
山空夜靜星斗低但聞石間鳴珮玦恍如軒轅張樂
臨洞庭引商刻羽響噌吰我有高歌一和之此曲仿
彿遊仙行忽覺天風吹滿面臥看落月西南傾

晨行園中遣興

晨起涉中園草深露漙漙林風一蕭散煩暑覺已去
宿鳥猶在樹孤蛩深自語幽懷易爲感秋意遽如許
歲暮亦何悲志士同寒女

次金化李使君題觀音庵韻

岳寺隣官舍烟霞只數重吏人多禮佛雞犬亦聞鍾
公退每獨往超然唯客從知君有山癖最愛問何峰

送李大來往鐵原轉向永平白鷺洲卽其所卜
地云

鐵峽深驅馬隨山到永平新霜千樹赤秋水一洲明
已與高人約應知野老迎平生卜居志今日送君行

時與金水亭主人約
會云故第五及之

感懷

天地中間坐一床閉門寥落感流光六經有志終難

究百歲爲生也未長秋半水亭風瑟瑟雨多山逕草
荒荒却憐小棗花如昨朱實團團映夕陽

其二

西林有鳥夕知還老子居深亦閉關夜久衆星光倒
地秋高雙杵響依山幾經送客遊楓岳新約從人卜
柳灣細酌濁醪燈火底且將兒女作歡顏

其三

隱几柴門秋葉深閑來聊復玉壺吟途窮尚負崢嶸
氣歲暮頻驚寂寞心臥聽百虫喧四壁起看孤月在
西林幽懷不欲論羲易天地微陽又變陰

禮院夜直

不謂重來此秋燈坐有思還同騎省直聊復鴈門蹄
薄宦猶人忌微蹤豈上知叔孫還可笑徒解起朝
儀

曉起詣闕

珂馬侵霜起鴻臚曉奏催仰雲占紫極隨月到銀臺
劍珮聲相接鈎陳仗半開掖庭頗識面看我昔曾來

九月十四日差祭 永昭殿與李齋郎

衡坤

同

賦

闕殿秋陰肅深宵月在庭地清薰細菊天近見多星

履運增悽愴齋心接杳冥知君自膚敏端合奉明靈
永昭殿齋舍贈李齋郎

紫極門高近九霄閤宮深處百靈朝尚思去歲爭趨
走却喜同君坐寂寥夜久樹林渾得定天虛星斗不
勝搖吾東亦有房中樂風雅千秋道未消

訪李生妙寂山居

堂號
經鋤

衆岫環如郭中開自一村披榛問田父繫馬得柴門
暝意羊牛定秋華黍稻繁帶經鋤亦可吾道在丘園

其二

半世歸田志從君始一謀地宜仁里卜人合暮年休

野菊還孤笑秋泉亦遠流有僧峰頂坐招我白雲遊

其三

獨臥妙寂內知君心境虛山林有善虎野水不驚魚
萬事天遊外孤峰風嘯餘閑庭含太古苔色上琴書

其四

萬木擁秋澗孤亭生夕寒獨留山月色分與野人看
石出泉彌潔雲深地不乾枝間有宿鳥亦自占身安

初度日感懷

孤懷此日又孤辰白髮容爲幾歲人兩弟縱存稀對
面外孫纔長且扶身深杯氣壓騰騰雪老樹心生脉

脉春直到明年稱耳順可能吾道與時新

差祭南山晨起詣

闕仍赴祠壇作

壬辰

未拋雞肋此何官又復晨趨急馬鞍
令節降香崇政殿明朝有事國師壇
穿雲逕抱層城轉坐雪衣垂絕壁寒
最覺新年多氣色萬家簫鼓動長安

其二

岳頂靈槐夜有風起看星斗正當中
禮崇王命新將幣神降祠官儼鞠躬
地設山川爲衆望春行雷雨作陰功
分明盼蠻臨壇上異氣通霄若放虹

舍弟公遠

除天城萬戶余與之徃省先墓志

感

今朝拜墓喜兼悲爾是吾親最少兒餘痛不曾忘死
地此榮那得作生時傷心草復茸茸色着淚松皆短
短枝我有別魂隨去馬直從山下到天池

公遠將行夜飲叙懷

駿馬赤茸鞦金鞭橫遠道柳條繫不得去齧熊川草

其二

氣勁消炎瘴心雄眇巨洋角弓看在手東去掛扶桑

其三

願見此行久臨分情反傷衰年豈堪別吾鬢不勝霜

其四

浪泊舟中老當時憶少游君須賣寶劍歸買一田牛

夕坐

日暮天閑意欲愁東風脉脉坐西樓峰頭夕氣收餘
靄柳外春泉響暗流更覺今年添白髮昨看吾弟下
南州邇來百事銷高興寒食臨時不出遊

去年春與鄭惠卿輩約遊積翠臺而諸人有故
未就今春已過半矣悵然興懷吟成一律却寄
惠卿兼示高美卿

積翠城西百尺臺娟娟日夕思徘徊故人潦倒今何

似前歲清明忽復來草色遙應接天去杏花多是傍
山開習池尚有風流主騎馬能成一醉迴

寒食日差 大廟贊者與祭退而賦詩

清廟深嚴地絕塵 祖功 宗德合斯裡欽承百世
終無怠陰祐千年固有神春冷殿臺多雨露夜明燈
燭共星辰微臣與沐 先王澤贊謁還爲序事人

雨中遣興

一雨千花各動心東風偏着水西林青山洗出皆新
色黃鳥飛來亦好音白髮不如春草短清尊那得酒
泉深此情只可憑陶寫詩欲成時費獨吟

對雨寄高漢卿

臥聞簷雨到黃昏山木棲鴉欲掩門雲氣洩來縈一
郭澗流橫去入何村春愁帶酒渾難解別意將花共
不言昨歲弼峰今在眼問君能復憶西園

前年有約
未就故云

花下

吾家老杏昔誰栽與我徘徊此眼開得酒方知今日
樂看山却似故人來何妨白髮酣仍臥更着黃鸝語
不迴多笑風塵二三子十年曾未一蓮臺

老杏口號贈友生

老杏生在屋西偏屈曲不知幾歲年去冬狂風折其

幹今之存者餘一邊可憐造物猶不棄噓得枯查
生意雨滋日炙開滿枝花雪鮮明光照地花間老翁
撫花歎此樹少時吾朱顏朱顏白髮遽如許坐見花
開復欲殘人生百年會有終不須枉恨花從風但教
花能結子翁飲酒明歲看花與君同

吾弟

吾弟天涯臥孤城碧海春瘴花寧媚客蠻舶忽驚人
萬戶功名地三年霧露身燈前聽雨意相憶一傷神
差祭漢江得雨志喜

滔滔江漢帶邦畿國有明神衆望歸禮幣千年尊祀

典靈壇白日伏陰機淵光夜照齋時坐雲氣晨生祭
後衣得雨敢言臣力致 九重兢惕即親祈

園中雜興

垂枝杏子未全黃引蔓葡萄故自長獨向樹陰深處
坐披襟五月有微涼

其二

荒園一半草交苔白日菜花相映開滿地幽香空自
老有時雙蝶度牆來

玉

也知瓌質本崑良追琢方成絕異章棄去不妨從抵

鵲用時端合薦明堂

劍

龍泉無用匣中閑
剝落龜文化繡斑
直是氣剛藏不
得有時衝射斗牛間

祖妣忌日述感

吾父逢今日常言早喪悲居然及兩世痛矣此孤兒
敢道修香火猶知記歲時夜簷聞雨滴應共淚雙垂
得舍弟天城書

三月千金得一書
書中歷歷意何如
地皆瘴癘兼天
熱人與黿鼉共水居
平世功名乘障後
異鄉消息舉

烽餘伏波銅柱真雄略猶羨當時下澤車

嶺南侯烽之舉自天

城始故第
六及之

聞蟬鳴有感

獨立樹間久遙聞風外蟬鳴悲當落日響斷只高天
悄悄秋生處寥寥門掩邊從來志士感多是爲流年
七夕李和仲見過贈詩和之

西林夕涼集有客此中過萬戶初生月雙星稍度河
玄談入天遠令節感人多曬腹終非俗高情更若何
送李和仲歸善山

鳥嶺橫天秋鴈飛君今匹馬洛東歸故鄉路熟連宵

夢慈母縫餘久客衣北闕獻書時不偶南山種豆計
還違唯應學業加磨琢養得蠶絲入繡機

送李大來往鐵峽

八月秋高古貊墟峽深雲水淡僧居白頭不願封侯
貴羨子今朝去讀書

崇祭崇禮門

秋霖越三日禱事瘳垂成崇祀古禦災肅此王命
行恭陪大夫後張組宿層城朱雀翔中天麗譙何崢
嶸沉沉下金鑰屏絕車馬聲陰陽有通塞妙哉造化
情涼颿掃氛翳雲然開太清衆星各守次中夜燦光

品我欲叩閭闔乘風以上征精感諒無間誰道我微
誠

秋園感興

暮雀歸何急寒花開故遲白頭方獨立幽意若相期
霜露誰非教乾坤自不遺杜陵秋雨歎吟罷莫深悲

伏枕

伏枕蕭條背郭村蒼山未夕閉柴門繁霜砧杵千家
肅短日烏鴉一樹昏白髮臨風妨落帽黃花滿地笑
空尊少來親友多凋謝垂老孤懷不可論

廣津哭送士彥喪車歸途志感

十月寒江曉有聲扁舟霜露濕丹旌孤兒泣血扶歸
觀不似當年上峽行

其二

送君今去欲何遊飲却平生寄小舟白首臨江千點
淚散爲寒雨落驪州

雙檜堂月夜卽事呼韻

霜鴻嘹唳度遙空落葉飛回滿院風獨愛娟娟數枝
菊挺然人立月明中

歸臥小齋耿然不寐呼家人酌當歸酒一杯飲
之微酡用風韻演作八句朝起錄呈雙檜堂主

人案下

一溪南北兩衰翁氣味平生見許同披卷每於公退
後閉門還在衆喧中高杉葉密猶通月老菊香多不
避風甕底當歸酒新熟斟來兩頰發春紅

次雙檜堂韻

十日過從三日疎君家物色似吾廬閑情直欲無羈
束俗事何由一掃除白髮亂披歌枕處蒼山深映下
簾餘但教目力分毫末看盡平生未讀書

冬朝卽事

山窗受初旭寒雀繞簷喧老子猶高枕隣人稍出門

繁霜吹木葉細水抱雲根寂寞詩中境多爲獨言

園中試步 癸巳

春入柴門積雪開小園扶策一徘徊柳心欲動風先
起泉脉纔通雨却來實有歲時垂老感更教花木向
陽栽甕中尚喜殘醪在客至留醺莫遽迴

禮院曉起

院直何曾寐春宵也自遲俗緣渾似縛官事每如期
短燭冠裳正殘星僕隸知垂垂御溝柳欲學鬢邊絲

閑步

緩步青天一角巾東風白髮此溪濱孤峰有氣常如

雨萬木生花各自春。脫却冠裳元外物。臥來丘壑卽
吾身。日長地僻柴門靜。山鳥相呼似故人。

以上 尊號告 宗社差祭社稷卽事賦詩

大德微稱叶明神。誕告同奉香從。北闕鳴玉到西
宮。牲璧靈壇上衣冠。淑氣中夜深。瞻紫極星漢滿春
空。

遣興縱筆

水流日長溪北涯。柴門不閉是吾家。一聲兩聲隔林
鳥。欲開未開當戶花。案上攤書卽老子。胸中蓄氣只
青霞。猶嫌眼界少。空濶萬木參雲山半遮。

樹下

愛花常早起老子亦何癡客至開門倦兒扶遶樹遲
得詩山色近當睡鳥聲移此意將誰語唯應靜者知
與諸子遊三清洞

暮春日熙和羣物盡出遊携我會心人振衣登北丘
少長各班荆疎濯臨遠流雜英紛照燭蘭葉綠已抽
惠風時自至芳氣散林幽緬懷蘭亭集宜此穠事修
彩毫奮奇藻清觴迭獻酬興酣發長謠天地廓以悠
人生苟自適貧賤忽公侯願以一日歡消彼千歲憂
詠歸更何人真樂此可求

白蓮峰歌

客有爲我置酒白蓮峰少年來者如雲從列坐雙崖
屹相向脫巾却掛峰頭松俯視花柳層城裏無限東
風此時起東風吹花入三洞太乙真人問誰是青冥
眼冷笙鶴遠古壇春陰響流水神仙亦恍惚我輩看
在此白雲爲蓋草爲筵乾坤萬古來樽前老夫箕踞
但羈飲諸君落筆如雲烟持觴語諸君我昔爲少年
眼欲空一世手欲摩青天花開酒熟登此臺雪老西
翁與之同徘徊哦詩不作烟火語兩公拍肩稱洪崖
少壯幾時吾已老白蓮峰高又春草我今與子爲此

遊綠鬢朱顏豈長好醉發狂歌四座聽
傍有鼓琴風泠泠杏花未落西澗去
君不見千金不易一蘭亭

先到積翠臺西坡坐吟

獨來下馬坐西坡風日新晴天氣和
春色千家盡花柳王居百世此山河
遊絲嫋嫋吹還斷芳草青青踏更多
待取諸君十斗酒看吾披髮一高歌

諸子旣至登翠臺命以西韻余亦賦之

少年遊樂此城西走馬採芳眼不迷
錦澗度來千樹色翠臺登後一鶯啼
醉眠幘上風花落起視尊前山日低
春未盡時君更到水清沙白我東溪

積翠臺歌

昨日白蓮峰今日積翠臺遨遊兩山間春興何悠哉
積翠之臺高百丈西岳中天一俯仰宿雨新添玉女
盆白雲半抱仙人掌九重宮闕五鳳城魚鱗萬屋
連飛甍暮春三月花如雪搖風蕩日天地明黃塵涇
滾吹大道高車駟馬何縱橫問君此時方得意何如
老子看花行花開花落復幾何一年春色餘無多同
遊少年十餘輩前有美酒金叵羅西飛白日東流水
君今不醉聽我歌

春晦日差祭

敬寧殿齋舍卽事

數子登高約逸春長松之下北溪濱却投 閤殿深
巖地苦被微官潦倒人乳雀將雛新羽翼餘花在樹
尚精神平生骯髒今消盡直恐青山笑此身

藝圃卽事

春華誠可惜夏景亦云好開窗東嶺青漠漠雨中草
園桃尚餘葩孤笑悅幽抱家人催理圃種菜須及早
貧居亦有務食力聊自保富貴豈非願吾且順天道
不愧帶經鋤優游以終老

燈夕

觀燈俗相誇萬家爭夕張高高掛半空風竿互低昂

魚龍舞恍惚紫鳳森翱翔綠樹散彩焰金粟何煌煌
西通雪山照迥接千佛光少年縱游觀走馬登彼岡
彈箏間擊缶醉歌烏烏長伊余獨閉門了然坐一床
澹月在幽花微聞庭院香心知燭天盛羣戲樂未央
繁華不盈眼方寸洞八荒意闌遂就枕夢去拜羲皇

春後卽事

日永綠滿地寥寥庭宇空危花如恟雨老柳不嫌風
酒盡春遊後鶯啼午睡中深居還可樂好作祝雞翁

題畫

補墻花

閑花亦有用綴蔓補墻缺猶能疎引風不須深蔽日
蓮花睢鳩飛鷹

猛鶻逐睢鳩側隣寒塘水知渠有老拳何不捕梟子
青草雙牛牧兒

烏犍背牧兒行緩且銜草前者立回首意欲同一道
三鼠爭瓜蔓

三鼠共一瓜食甘爭必鬪無瓜鬪則已種瓜那得茂
百日紅

花事惜易謝春光能幾何東君不輕借百日亦云多
粟穗雙鳥

野田粟已熟山雀踏垂垂且莫啄食盡恐令田者飢

澄閣與主人夜話用杜詩韻

西樓此夜聽短笛復清砧却是孤燈夜依然舊客心
征鴻雲外疾落葉雨中深尚有論文興朱絃發古音

謝恩使別章

時清主賜送書
籍故有此謝

吾東珠玉半中原今日看公又北轅存國可忘神
考德賜書還作虜皇恩秋風忽已生灣上客意蒼然
滿薊門蹈海誰如魯連子當時雄辯折新垣

奉寄谷山金明府

君有篋中線五綵絢且輝金鍼一爲施意欲補衮衣

平生鳶鵞綉妙手與願違反爲峽氓褐于以禦冬威
歲暮北風烈雨雪何霏霏黃堂豈不美念彼寒與饑
抽心作千燈遍照紅女機濟物卽素志窮谷得陽暉
願君廣爲仁要令家國肥玉堂有虛席王命待其
歸

示惠卿來訪

衰年苦無聊親友日以稀末契托後生心跡故多違
抱疾臥北郭蒼山烟火微喜子不遺我來扣雪後屏
手杖出延客留坐共牛衣示我囊中什作者殆庶幾
商確到千古郢斤可一揮閉關覺生意葭灰昨已飛

古木不曾死寒鵲坐相依荒園亦物色願子無遽歸
回顧窻間日爲我駐其暉

雪後

老子閉門山雪裏日高三丈睡初起小村籬落稍生
烟溪女斫冰來汲水

直夜

此夜西樓梁甫吟天高星斗白森森幽詩一廢嗟誰
繼坤卦將窮見復臨萬木烏鴉風處動千家雞犬雪
中深形羸髮短從他化獨有憂時未死心

風處動一作風後定

冬至

天下同寒無古今如何北陸最多陰風驅牛馬毛皆
縮雪壓龍蛇窟更深煮粥四隣猶舊俗閉門方寸忽
春心欲尋造物難形色傍有梅花一笑臨

走筆寄金正乞酒

甲午

乞君春酒兩三甌澆我胸中萬古愁自笑此身無達
相且須生作醉鄉侯

西湖十景

蘇堤春曉

漠漠柳梢月輕雲弄春曉已聞踏歌聲花底翻宿鳥

平湖秋色

平湖一萬頃秋色浸空濶遙看鴈拖去天際半明滅
花港觀魚

水暖花港深羣魚爭出戲宜觀不宜綸須識放生意
柳浪聞鶯

維舟柳岸側上有黃鸝語只得隔樹聞不知在何處
三潭印月

一片水中月三潭照處同誰知印無跡非色亦非空
兩峰插雲

壁立幾千仞雙峰雲霧連不緣深着地何得便擎天
南屏曉鍾

南屏月欲落鍾響出禪房喚起孤舟夢漁樵亦自忙
雷峰夕照

夕陽有遠意掛在西峰杪孤霞一邊開鳥沒天更杳
麴院風荷

十里鋪一色荷花高下紅香風吹不斷偏入棹歌中
斷橋殘雪

危橋橫一水半帶殘雪白山僧時往來猶得見行跡
衙夜

寒食清明寂寞過春愁暗與病相和夜來獨對空庭
月照得殘花落處多

聞琴婢訃

窮厄當年共死生至今追憶骨猶驚
曾無一飽酬勤苦反使天涯作此行

其二

行時自斷返無期臨死悲懷說與誰
獨有歸魂猶識路小郎呼媼泣相隨

述感

哭汝纔爲昨郎今去聘新空留一片鏡
不照九原人老淚應無目潛悲想有神
猿腸休更斷吾亦幾何身

其二

風雨空山裏孤墳草已長只應懷老父何處送新郎
不道他情薄空悲此世忙猶思許嫁日屏上綉鴛鴦

解職後作

此翁於世百無能榮極招殃坐負乘實有身名慙國
士敢云時議惜郵丞朝衣脫與客沽酒山閣臥看虫
撲燈萬事浮雲堪一笑種瓜君不見東陵

秋懷

伏枕山長近荒園又得秋葉垂聞露滴牆缺見螢流
天地橫千古妻孥繞百憂處窮無定力吾道愧前修
曉起送子昂

並枕臥山閣秋虫共人語開門却惆悵君與月西去

巡菜圃作

今年何厄運種菜亦不吉循墻六七畝枯瘁半蕪沒
葉疎多烏啄根短盡虫嚙秋雨澤已微霑灑不終日
西風吹荒圃白露戒寒節悄悄歲向晏天道有肅殺
默念造化意似欲嫌傲兀奪祿猶不足餘毒及此物
顧余甘受命無食詎敢恤君子貴固窮小人營口實
爲生有豐約於道孰得失緬昔聖菜色弦歌猶不輟
撫茲三歎息殘綠映霜髮雲歸天更高倚杖待新月

秋夜

樓上涼風吹獨眠。仰看孤月掛初弦。
荒園寂歷虫依草。列宿蕭森鴈度天。
漳水病懷無故侶。杜陵秋興入衰年。
崢嶸却憶枚乘筆。萬里觀濤一霍然。

其二

一病逢秋尚未蘇。心同倦馬念長途。
家貧獨保千金劍。身老空懸五岳圖。
落木無風猶自響。驚鳥得月或相呼。
可憐節物催遲暮。零露霑衣清夜徂。

東翁挽

看君才格絕孤奇。生即泥塗死足悲。
促促簿書消半世。悠悠里社逐諸兒。
乾坤不借三間屋。風月空留數

卷詩永夜草虫哀欲訴此翁遺恨爾應知

其二

獨臥山阿君不來停雲滿目一徘徊相思尺地猶如
許此去重泉可得迴短髮蕭蕭將落日寒花悄悄近
登臺牙絃欲奏誰爲聽泯默餘生只自哀

趙郎南行追念亡者不勝感悼作詩贈別

情見于詞

痛見潘郎詠悼亡可堪今又送潘郎燈前別語虫俱
咽嶺外征途馬亦忙須念此生無一樂終期舊好莫
相忘人間地下應同恨想有孤魂也斷腸

夜坐吟寄南隣

孤燈含萬古照此寂寥心仰視天河白無言秋夜深
新霜催鴈過落月下鳴砧隔水還相憶應同隱几吟
壬戌余從通信使赴日本在館中日與野鶴山
唱酬有畫師常信在傍酒酣於燈下墨筆畫余
小像余遂持歸越明年秋鶴山寄余三十韻詩
有同志多修契歸仁爭寫真之句下註曰別後
諸人屢畫公像使僕作贊語故云及至辛卯日
本復請我使槎路載通余乃爲書寄鶴山以謝
前詩之意而仍求其所畫像一本則鶴山已死
其子沂答書曰父嘗使常信爲公寫真四五幅

今見災不存或在遠方急難取來常信老無恙
在即使之更寫一大幅而贊語則從遺集中得
之代筆其傍云贊語卽五言短律輒次其韻仍
以記之

不必論前後分明只此人別來猶記面照處卽傳神
夢去三山月書回萬里春丈夫心似日胡越亦交親
感懷

天地容殘喘三年一病翁亦知名見忌未必道爲窮
傲骨爭山勢幽懷撫菊叢呼兒徑沽酒吾欲謝西風

小園還生事清霜菜始收三孱此身愧一飽老妻謀
衆壑無多響孤雲不復遊夜寒憐蟋蟀稍稍近床頭

其三

東翁亦已歿詩就却無言末路難開眼餘生只閉門
深秋霜露積短日烏烏喧倚杖千林外寒花獨爾存

其四

暮境空雙眼情來只自知却思南郭老多負北山期
白石泉頭飯丹楓葉上詩非無少年樂衰病不相宜

其五

秋懷不可道獨上屋西臺落葉堪人坐孤鴻似客來

百年雙短鬢萬事一深杯憶與崔林輩重陽每醉迴
其六

柴門欲將閉落景在庭柯病起黃花少詩成白髮多
凌雲猶浩氣據地亦長歌此意千秋濶英豪惜已過
寄扶餘趙使君

百濟江山坐嘯餘縣齋寥落似僧居不妨野老頻來
訴要得銀鈎判牒書

上候違豫累月臣民焦憂幸賴神明默佑竟底

平復斯誠宗社莫大之慶羣臣請設壽宴

上不許屢請而後勉從乃以九月十九日御正

殿受宴訖明日 下教軫民痼弊令 廟堂議
臣戶布口錢之法講定以 聞此則堯舜之心
而王者之政也糞土賤臣獲聞此舉不勝慶忭
感激之忱輒爲詩章歌詠盛事竊附於唐人應
制之義云

萬壽山高上壽筵 玉樓初罷夢釣天羣工競賀
王無疾太史仍書國有年醉退冠簪花並插禮成鍾
鼓日猶懸當歡却軫窮民事渙發 綸音講口錢

憶東翁

人間不復見東翁吾道蕭條痛益窮楚客招魂非故

里山陽聞笛更秋風一時回首交遊盡萬古傷心逆
旅同卽對黃花詩獨就可能傳語九原中

秋盡懷惠卿

黃花亦何意又作送秋歸感此衆芳歇居然西日微
蕭條方獨臥悵望故多違歷歷雲中鴈相呼高處飛
述哀

不道三年永魂猶父母傍何曾一塊肉獨此九回腸
葉積中園逕霜淒小洞房家人共驚慟開篋得殘香
早起

老夫朝起早簷角有繁霜已覺初冬候猶疑落月光

孤峰力獨壯萬木氣全傷愛爾龍蛇蟄存身道更長
淡日

淡日還生靄冬山尚有姿園禽啄木瘦隣杵搗霜悲
天地無全物炎涼亦一時將詩聊記興未敢古人期

題鄭惠卿田家錄

人生不必縮銀黃得作田翁也未妨莫道世間無好
時卽知林下有羲皇蠨叉夜水漁燈集稻穫霜天社
鼓忙此是野居真物色誦君詩罷憶柴桑

述哀

爾貌端且美爾心溫而直言笑不苟然實維女士則

更有爾姊良婉婉日余側惜不生爲男成我兩羽翼
聊用目前慰庶幾身後力誰謂反先我一病藥不得
哀哀臨絕語不自爲已惻惟念父母獨至痛結衷臆
持此入窮泉天地豈終極可憐一木石猶且寄縷息

其二

喜爾既有家猶不許遣歸老病骨肉少惟爾得相依
斯須不忍捨有此永離違孤魂尚憑我床几宛餘暉
朝夕臥聞哭無淚更可揮歲寒忽復至嚴霜結窗扉
刀尺昔代母誰復念我衣平生誦女則翰墨留芳徽
悲來時一撫回顧但歔歔枝頭失雛鳥獨宿亦不飛

其三

生兒亦云夭胡不留爾跡焚膏勸郎學餘燼尚在壁
感茲御窮意衿佩所不惜如何霜桂摧不待春雨澤
眄彼徇微祿千里嶺南客鮭菜縱盈盤那得飽殘魄
一往不相聞山川邈以隔悲風號中夜雪屋坐寂歷
念爾絕世行何由表貞白吾其及未死銘汝一片石

趙郎自南至

嶺南縱云遠卽有還歸時嗟爾地中魂一去無後期
入門見白衣執手喜更悲依然舊迎地宛對冰玉姿
遲遲語深夜切切向虛帷回風微動燭精爽若有知

非無包中物豈復爾手持惟應一息存見郎輒爾思

送趙郎南還

乍見不如別徒令亂人心會面俄已昨分手還在今
悄悄竹裏燈照我山齋深豈無一尊酒且復爲細斟
冬夜苦多寒冬天苦多陰坐念鳥嶺高客路綠青岑
北風雪滿背躑躅行且吟知君獨宿處夢想追故衾
南枝縱結棲終亦一羈禽願言勉加餐情至惠嘉音

卽事

罷官非得意高臥且窮廬病體還依竹閑情只在書
燈懸樓鳥後雪落閉門初閱盡悲歡事收心頓覺虛

夜坐述懷

雪壓山齋火半爐。青燈照我坐摩鬚。平生願學真君子，垂老慙成小丈夫。貧且讀書酬素志，病猶懸劍作雄圖。知心賴有床頭竹，歲暮相看也不孤。

雪夜

炯炯燈垂壁，騷騷雪墮庭。隔簾生灝氣，欹枕有微聽。中夜何寥閨，千秋一晦冥。蕭條萬古意，歲暮此溪亭。

此日

此日忽已夕，百年能幾何。人生天地間，壯志故蹉跎。讀書亦何用，窮老白髮多。匏繫鴨水東，五岳虛嵯峨。

脫劍一相送有客西渡河歸來坐孤燈浩浩萬古歌

贈鄭惠卿

老夫已矣今白首有如木蠋中則朽世人見之皆冷笑
君獨於余意何厚三清洞深天雨雪徒步朝來問
衰疾山齋閉戶寒雀噪北風老樹皮凍裂此時看君
病欲起一杯倒下春浹骨醉後高談動千古宇宙鴻
濛揭日月愛君玉立美少年新詩逼唐才調絕三淵
詞伯亦見許誰道委巷歌白雪天生爾才不與祿十
年身上猶短褐邇來頗爲口腹謀去從岐黃學奇術
我謂惠卿君莫悲男兒窮達不可期公孫混跡羊豕

間馬周草疏羈旅時君今韞櫝須善價道在從他知
不知長安甲第五侯鯖上客無乃曹丘生市中小兒
騎紫馬錦袍玉劍何光榮潛夫焉能知鴈肉獨見將
軍倒屣迎君不見深山豫章參天長不及枯楊生道
傍

曹丘生一作樓君卿

雪後卽事

雪後朝曦翳北林天寒不厭閉門深飢禽逐侶皆爭
食老子將孫尚擁衾却顧衆山多變色方知萬物一
窮陰瓦盆酒熟梅花底春氣還生靜裏心

廣津漁舍

臘月滄江雷怒餘雲波洲渚莽空虛舟中小兒不畏
雪終日短衣行捕魚

酒泉墮淚碑歌

春草原頭白日斜野人猶說舊行車傷心不待看碑
去淚墮東風滿縣花

甲午除夜

今宵有酒莫虛過欲挽流光竟奈何末路功名隨俗
了暮年妻子誤人多吟裁春帖誰先賦醉擊玉壺吾
且歌樹裏棲烏驚一叫層城曙色散星河

明日立春

題窻壁

乙未

百年身老此窻間一臥乾坤萬事閑尚覺胸中餘氣
在有時噓出滿春山

再疊遣興

吾今不恨臥林間濁酒高歌意自閑天下難逢是知
已眼前唯有一青山

家奴自西郊歸言女墓景色聞而悲之掩涕爲
詩

積雪荒山裏孤墳舊僕知當時灑淚處松柏不生枝
二月初一日

去年當此日爾病猶在床今朝不見爾那得更扶將

衰疾縱未死我豈餘寸腸臥聞汝孃哭酒食臨故房
簾幃僂遺跡不知魂在亡經冬園中木枯柯復噓陽
上有和鳴禽雛羽亦老蒼人生不如物嗟爾獨永傷

喜趙郎至

不識爾知否阿郎今又來非無對面喜更覺斷腸哀
病處疑猶在祥期奄欲回燈前語相慰有淚落含杯
三月初七夜與趙郎小飲爲別

烏嶺高漢水深不及我之送君心斷腸休論悼亡篇
把杯却奏游子吟庭前老杏半欲死昨夜花開微雨
裏花間有月照白髮此時相看意何似綿綿春草無

終極南紀東風一千里

從仁老乞得嘉菊數品植于窗前卽題

惡草旣鋤去邠無嘉菊栽端宜人與配却喜雨俱來
百本何妨衆秋花預想開未知天意在吾且着深培

治園

荒荒數畝園吾病久不治今朝試窺臨倚杖一嗟咨
惡草先要地盤據日蕃滋雨露與寵光自言方得時
嘉卉困凌侮蔓然衆蔽之剛腸寔所思安可視汝欺
手鋤斬頑根終日不覺疲毋令蔓難圖猶恐去或遲
崇長反非類天意庸測知淑慝故當別亦係人力爲

余心諒如此遑恤旁觀嗤最憐紫葵花回萼向餘曦
黃雀從何來鳴啄似有悲

夕坐招遠臺呼韻

蕭蕭秋意滿霜楓夕坐西臺落葉中不厭貧居多曠
地易招明月與清風

贈別申評事赴北幕

平生有眼隘塵寰跋馬今朝北出關行處地緣青海
水到來天盡白頭山孤懷俯仰千年外壯矚徘徊六
鎮間袖裏非無班掾筆燕然可復勒銘還

其二

胡山勢與地南傾，豆滿江流抱塞橫。
學士還爲一書記，朝廷最重北兵營。
風雲自古無佳色，鼓角當秋有殺聲。
若見訓戎鏖賊處，知君更欲請長纓。

夜來獨臥念別懷，抱作惡輒復吟成。
一律朝起錄呈申評事行軒。

青燈半壁耿無眠，別意今宵已悵然。
南鴈來時人北去，百虫聲裏月孤懸。
知君壯志輕千里，顧我沉痾困數年。
他日此情應見憶，臥看星斗白山前。

東山醉後走筆贈申評事

評事青衫馬玉珂，關山此去莫悲歌。
男兒氣槩看橫

槩出塞黃雲六鎮多

其二

老病難爲此別顏
追君且復到東山
樽前便有天涯思
落木歸鴻半醉間

重興水門

一氣三峰裂雄盤
北極尊遙看挿天
色忽得入山門
石壁秋花倒楓潭
夕照翻相期最深
處到寺欲黃昏

柳下集卷之五

柳下集卷之六

南陽 洪世泰道長 著

詩

閔漬巖懷舊

落日蒼巖上依然是昔遊故人誰在眼浮世一回頭
岳色猶孤立泉聲自急流西風吹白髮坐暎菊花秋

次和庵韻

峽雨千峰肅深秋氣欲霜相看楓色好此意澗流長
境勝難爲選行遲故不妨塵心宜受照且宿佛燈傍
太古寺歸路登山暎樓少憇夜投重興寺宿

白頭吾不畏西風看盡霜崖萬樹楓隣寺踏來山暝裏一樓留坐澗寒中雲歸衆壑渾無跡月照澄潭併是空夜久隔窗聞落葉對床眠與老僧同

東將臺

憶奉鸞輿上此臺千宮劍佩杳徘徊山河本爲王居設城壘還憑佛力開天語似聞嗟絕險廟謨尤急問奇才只今劍閣銘誰獻獨有微臣浪跡來

四月余以通禮院引儀扈駕來此

扶旺寺

午飯文殊獅嶺東西峰又宿此禪宮來穿萬壑爭流

處臥在千林落葉中秋晚菊花當佛座夜寒鈴鐸語
天風山河旺氣偏分占護得神京力最雄

其二

佛殿西風閑自開深宵星斗共徘徊高僧語帶天花
墜老子詩將秋氣來不謂空門歸保障還從勝處着
樓臺三年病骨今輕健踏盡千峰未擬迴

晨起送同遊出山

山中亦有別晨起出烟蘿悵悵溪頭立秋山空復多
初月

初月不成色烟沉山郭昏鳥還常谷口吾臥亦柴門

落葉欲無逕鳴砧知別村誰言淡生活妙意此中存

野田

野田黃粟受晴暉鳥雀羣鳴啄且飛少婦手鎌姑後
語繁霜未落刈將歸

東山溪堂與和庵同賦

不盡泉流響潺湲入夜琴孤亭更幽絕萬木一蕭森
激我衰年氣知君靜者心朱門有簪紱終愛此山林

其二

月出酒仍滿琴鳴山寂然相將寫幽意忽復感流年
暗樹翻霜葉崩崖落夜泉關河萬里客恨不此樽前

時季氏評事公已作
此幕之行故及之

其三

客到東溪溪上亭
天高木落水泠泠
石間採菊野人
語松下橫琴山鬼聽
秋懷酒樽亦蕭瑟
夜坐燈火何
青熒苦吟不寐萬籟寂
仰視星河垂翠屏

其四

千株桑栗一陂塘
偃息知君晚計長
白髮何來此老
子黃花猶作別重陽
客稀葉落渾埋迳
人靜泉聲自
滿堂看取百虫深
欲入空山歲暮日
烟霜

秋園

秋園物色日蕭條獨有寒花尚未凋老子閉門山寂
寂羣虫入窟夜迢迢閑居每惜光陰去病起還憐志
氣消愧把奏文酬祿食中原非復大明朝

時余以
製述官

製燕行
奏文

訪李大來金澤甫山居登西岡小飲用陰字

獨臥滿山菊君家秋意深留人坐西崦沽酒過東林
風月還今夜溪山共此心片雲閑不去微作水邊陰

其二

青山自可愛暝裏亦登臨寂歷澗泉響蕭森楓桂林
人方迎夜氣月欲解秋陰不厭尊前語霑衣霜露深

送李郎中子有出宰沃川

同隣猶恨稍移居此別還欣建隼旟
野老爭歌車擁雉家人免見釜生魚
西風黃菊當歧路東閣青山滿簿書
却愧巷中多鬼笑送君今去獨吾餘

竹西菊花歌

今年物候何太晚孟冬君家菊百本
朝來折簡招詩伴若過數日不堪玩
柳下老翁方伏枕興到不肯言病甚
載之長耳半欹側白髮來就花前飲
昨夜霜風動萬木落葉紛紛滿墻屋
菊於此時獨挺秀花色鮮潔氣清馥
乃知花有隱君子愛菊其人亦非俗
停杯

却憶拙修翁菊花盛會傾諸公當時我爲座上客見
君氣味翁能同拙翁去後菊無主東籬寂寞騷壇空
君今勝事猶不墜高堂留客菊滿地菊花向我更一
笑酒綠花明兩相照不知明年此會能復續滿座賓
客誰最少

遣興

今日亦已夕孤雲何所歸閉門還獨臥與世故相違
歲暮山多瘦村深菊亦稀簷間有宿鳥意定不驚飛

其二

寂寞應吾道山寒復掩扉魚龍初夜睡烏雀盡秋肥

坐看三辰轉方知萬化歸窮通與榮落人事亦天機
卽事

隔窗寒雀啁枯枝天意微茫欲雪時病後形容從客
問靜中懷抱與山知窮居不廢歌商頌暮境偏多感
楚辭送客昨歸雲峽裏桃花春水杳難期

贈內

一生筋力竭誠忠獨未秋毫與報功今日牛衣免嘆
泣此翁猶可作英雄

代答

只幸松蘿共一身敢將衣食恨居貧梁鴻德耀名猶

在誰識當時富貴人

塞下曲寄申評事

鏡城西北盡黃榆
絕塞無塵夜月孤
細酌葡萄千斛酒
每燒紅燭讀孫吳

其二

玉塞經秋士馬驕
幕中無事好相招
却將數騎平原去
長白山前看射鵬

其三

六郡健兒誰最豪
強弧洞鐵劍吹毛
平生自有吞胡氣
恨不今年太白高

其四

牧馬千羣飲黑河邊城日暮鼓笳多二更欲出陰山
月淚落胡兒敕勒歌

其五

胡姬十五貌如花抱得琵琶半面遮彈作千秋出塞
曲漢家唯有武剛車

其六

雪沒窮荒鳥獸稀城頭落日黯無暉遙看馬背千斑
血載得南山虎豹歸

其七

月出孤城羌笛哀望鄉臺上獨徘徊曲中暗覺催楊柳早遣東風送客迴

至夜

一氣暗欲動葭灰中夜飛雪霜何力猛天地此心微
星次寒相守雞鳴曉不違更思殘臘退老眼看春歸
夜讀高霽峰檄諸道文

閑齋燈火坐宵分一讀苔軒義檄文暗覺樹間如有

泣至今山鬼亦知君

苔軒即霽
峯一號

明谷崔相國挽

神童不數李長源慧識須看異質存
髭下兩眸無物

隔手開三十六宮門

其二

天生公輔必奇才玉立朝端八上台始識讀書真宰相文章元自六經來

其三

一生憂國愛君忱進退無身只苦心此意從來難說出傍人不識上天臨

其四

內厨天語送駝漿阿監臨床勸一嘗玉腕撫來雙淚送此生無復拜君王

其五

雪滿山齋臥病身
悲歌中夜一傷神
應知地下翹材館
不着人間臭詬人

卽事縱筆

丙申

吾釀遲於四隣熟
他家欲盡我初嘗
世間萬事無先後
晚境誰知味更長

早起

憂來常早起
伴我有孤燈
曉色還墟落
春寒尚雪冰
端居翻似客
老境欲無朋
車馬朱門咽
低頭我未能

立春

積陰終不敵微陽，天地方能吐氣長。
北極日臨雙闕麗，東風酒熟萬家香。
綵幡插戶看初剪，春菜登盤憶舊嘗。
老手尚堪裁短帖，好將花鳥賣吾堂。

送臨陂趙使君

作吏身兼隱，因人地卽清。
從來何水部，此去謝宣城。
大澤春雷動，平蕪野馬生。
東風吹不盡，莽莽送君行。

出門

孟春今日得微暄，曳杖行吟始出門。
老樹受風心更動，淺山籠靄氣全昏。
偶逢峒客論花信，閑與園童學鳥言。
垂死此身還病起，亦知天地有私恩。

春曉

我病氣已衰春寒眠更少高齋掩殘雪窗色稍迎曉
庭前有喬木臥聽鳴山鳥身閑且自適方寸凝衆妙
日出羣動忙萬古事未了

遣興

身老意更長聊自撫餘生結髮抱奇志淹留遂無成
居然迫晚暮衰疾故相嬰但恨失聞道哀樂未遣情
深居且養拙漸覺身外輕谷風破春寒羣木日向榮
覽物起長謠懷哉感嚶鳴願言不在茲幽懷悵徒盈
金士修在岳寺與魚李兩斯文講論朱書有唱

酬詩歸以示之求和甚急遂次其韻

一榻論天地三人坐雪中
闢來闢嶠境喚起考亭風
古寺春還入深山夜自空
當時舍瑟對言志不須同
哭女墓

萬死吾猶起三年汝不歸
方知入地久但恨出城稀
野草無人跡春山有雉飛
向來經日別臨去輒牽衣
其二

昔見山仍在今來草復春
世間猶有父泉下豈爲人
我自招魂苦誰當灑飯新
嶺南非死別明日又傷神

時趙郎又
將南歸

送聖運南歸

明朝嶺外此燈前
別恨當春更黯然
不識蘼蕪有何意
每將君去到南天

對桃樹有感

窗外夭桃汝所栽
至今花欲向人開
枝頭白蝶偏飛繞
想有孤魂化得來

送李子往忠州

君去扁舟意忠驪
兩峽間逆流應累日
落帆是何山
江漢孤懷曠田園
一臥閑雨催梅子
熟知我待西還
鄭惠卿自北漢至以詩見示和贈

君自重興寺裏歸深山三月亦花稀也應踏盡千峰
色看取烟霞上葛衣

題李叅判燕行錄

蕭瑟春秋後死悲中原消息賴君知深嗟 永曆無
遺統可惜平西枉義旗秦帝城猶萬里壯胡雛運豈
百年遲南翁問答真良史忼慷長言當黍離

古意

歡知儂貌好人道儂貌媼君今握明鏡那惜照蛾眉
寄金川洪使君

病懷方獨臥黃鳥語西林却憶郡齋意泠然川上琴

恕菴申學士挽

丈夫負奇氣何得草木死眇小六尺軀其心卽千里
文章亦不朽意欲子瞻是吾東不滿眼藝苑方高峙
平淡發奇濃許我爲知己乃知五色毛斯爲鳳凰子

其二

青冥發脩軻謂言無不之秉筆森袞鉞更用春秋爲
宜盛白玉堂淳父衆所推奈何歧路間形跡坐相疑
遂令易退心便作江湖思邀我漢上亭指點龍門奇
虛舟一以繫主人今爲誰

其三

相逢必言詩揚扅極千古謂我門路正風格逼唐杜
愛才若己有他人棄如土深憐短褐寒不惜爲宸宇
嗟君今已矣此世豈復覩俯仰宇宙間衰喘餘一縷

其四

去秋木落日送君將北征酒酣東山亭立馬不能行
念我病或死留語見深情丁寧勉將息好作歸日迎
誰知子今逝回顧我猶生向來握手處已復秋蟬鳴
摩挲絕塞書惻惻只吞聲

其五

朝來過君廬門館宛如昨窺戶不見人簷雨垂總幕

縹帙生素埃玉觴湛虛酌空庭少客來草根伏雙鶴
獨與阿咸對淚隨言共落暗室發光恠璀璨留奇作
誰謂子爲天身後不落莫顧此斷絃慟微音無所托

哭東翁墓

不盡當時哭還携數子來相看一孤塚更勸此深杯
末路多論跡冥司或愛才樵歌亦腸斷似欲說君哀

其二

恍惚來迎我孤魂野草邊重泉無一日浮世欲三年
樹短猶懸劍山空只聽蟬斷雲低不去天意亦蒼然
讀宋史文天祥事有感

扁舟崖海欲歸何力挽殘暉尚奮戈不見雄圖吞羯
狗空留正氣作山河向來南渡無君久從此中原入
虜多獨恠天心與人異茫茫宇宙一悲歌

李一源投示一扇畫其所居翠麓軒夏景曰願
得君一絕口占題之

萬樹陰中一角巾日長山鳥臥相親如今只作尋常
境異日爭看畫裏人

卽事

樹陰涼滿地秋意草虫悲却憶前年事東翁對坐時

秋懷

垂老逢秋意更悲三年一病太支離
庭陰落葉虫鳴處天濶無雲鴈度時
骨相判爲當世棄文章留與後人知
西風忽覺吹雙屐岳寺尋僧近有期

訪北漢馬上呼韻

城中無地此心開白日紅塵萬影催
興發不知身老病秋風披髮入山來

到重興洞口余與安國賓向重興寺李一源金
莘老鄭潤卿往清潭期日暮會宿重興寺臨分
呼韻

白雲峰色聳朝晴似欲迎吾上寺行此去終須期絕

頂一山分得兩溪聲

北漢山城

溫王霸氣莽空山客到悲歌古堞間
龍象重開千佛地金湯遂作一雄關
上方鍾鼓秋聽殷列堡旌旗晚
插閑誰識書生亦憂國初非北狄與南蠻

宿重興寺

去年曾宿此林間今日諸僧半識顏
木落夜泉鳴衆壑天高秋露下空山
塵根有累吾今老淨界無爲佛
自閑獨看白雲峰上月每從西去却東還

出重興與諸子分路用歸字

諸天不易到一宿便言歸出寺還分路看山又落暉
水香供佛飯塵污入城衣絕愛空門內蕭然無是非

清潭次三淵韻

看君神骨古仙同那箇纖塵點此翁餐得晨霞知腹
果照來秋水覺心空讀書却在岳雲上鳴磬時聞庵
樹中不識真源自何處欲尋天路去無窮

雨夜

臥聞窗外盡秋聲涼雨鳴蛩亦不平衰鬢欲摧兼木
落壯心猶在似潮生早知曲藝名爲累多愧微官祿
代耕昨與故人蕭寺宿暮年丘壑是吾情

晴

三日秋霖得一晴北山初旭更鮮明孤雲壁潤看猶駐亂水沙平任自橫蘇後物情皆快活洗來天體本
高
清病夫也覺生心喜竹杖巡林步却輕

挽睡窩崔子長

名爾泰即世所稱石假山主人

壺中天地玉山前鶴髮韶顏八十年市巷日高呼不起只疑猶作據梧眠

其二

去秋要我一相過枸杞叢邊記醉歌庭際數峰依舊在閉門黃葉雨聲多

送申水曹聖與出守青山

水部清寒亦抱關風沙烏帽欲摧顏
漢廷未射匡衡策吳郡先分謝朓山
秦熟峽村良稅薄苔生鈴閣吏書閑
公孤自是君家物寧久樓邊百里間

李子平宅夜集同用遊字賦詩贈朴士賓關東之行

醉拍金樽歌遠遊故人相對月當樓
行將楓岳登山屐興已蟾江上峽舟
半夜日生先絕頂太陰龍臥各靈湫
東臨更可觀滄海袖裏全收九郡秋

此行登毗盧峯觀九

龍淵東遊海上遍歷九郡而歸云

鄭潤卿來訪

獨與菊花臥無人知此心
開門得好客步履到荒林
山日尚餘照秋天多自陰
相看一杯酒衰意亦長吟
夜

獨步吟黃菊仰看山月懸
有誰知此老忽復送今年
草木寒初隕魚龍寂已眠
炎涼是底意天亦不期然
其二

避色紛爭際存身屏蠶餘
衰年猶愛劍靜夜獨觀書
月午收羣動霜高淨太虛
方知望墳息夫子不欺余

獨臥

獨臥常難動沉冥只此心何妨來客少自愛閉門深
夜氣分天地秋聲一古今歲華斯可惜猶未及窮陰
趙郎自嶺南歸旋有赴幕之行詩以爲別

君莫催行盡我觴傷心那復說存亡冥途只促喪期
短薄宦仍添別日長故國青山還一夢異鄉寒菊又
重陽惟來老病猶無死也有當時未斷腸

九日

今年秋思太生哀又送重陽寂寞迴老子未能忘落
帽菊花猶自勸含杯閉門一病交遊絕歌枕三更往
事來直是天公憎此眼不教高着白蓮臺

贈安進士國賓

君如秋鴈欲南迴
木落天高旅思哀
夢裏烟波懷甫里
燈前風雨感靈臺
身超傀儡千場去
眼透鴻濛一氣來
白首自嗟相見晚
世間難得是奇才

送宋評事赴北兵營

翩翩書記朔雲間
北望秋陰滿六關
元帥臺前猶漢月
愁州城外盡胡山

其二

玉帳葡萄金叵羅
琵琶羌笛夜相和
請君試向胡姬

問樂府猶傳此老歌

去年申評事在北幕余寄七絕十首則令妓輩習歌之云

悼恕庵

有志無年自昔悲嗟君今亦止於斯世間至寶人難
得天下奇才鬼不知誰可更論千古事只應終作九
原期朱絃玉珮都零落從此餘生欲廢詩

夜

蒼山初月隱黃昏老木棲鴉此一村萬象卽看當雨
雪百憂誰識臥柴門天寒酒力不成醉夜久燈花空
自繁却憶古人多厄困千秋朽骨亦奇言

古劍篇

我有古劍長尺餘其身雖短氣赫如直疑出自酆獄

底龍光猶射斗牛墟邇來閉匣三十霜苔蝕塵埋久
晦藏家人小兒視鈐刀委擲不復心在亡我謂神物
天所惜濯磨雪鏐金爲裝秋濤掛素壁隙月流精光
携提不離身呼爾作死友嚴霜裂石天氣勁隱隱臥
聽龍夜吼龍夜吼聲正悲平生恨荆軻擿柱徒虛施
坐令羸兒帝天下不及當時屠狗爲嗟爾得我鄉得
重猶幸不爲割雞用且須深藏待千金會有天子爲
大勇

送金生赴燕

立馬霜天酒一杯燕歌千古莽生哀市中百物看如

土買得荆軻七首來

送安國賓歸忠原

漢代翹材館猶聞引布衣扁舟江漢濶歲暮送君歸
豆浦亭舍伏呈晚靜相公

赤烏還天放超然臥此樓安危唯一老進退且深憂
野曠和烟色江寒帶雪流蒼茫萬里意冰岸閣虛舟
金道以宅與士修及李一源朴士賓會話用杜

韻同賦

白髮吾如此看君亦已翁不孤今日約頗喜昔年同
雪落停杯上春生閉戶中仍聽海山語高興遂無窮

時士賓自關東
遍遊而歸

其二

千古琴書事天其與此翁何妨
一世棄獨賴數君同
遠與扁舟裏高歌陋巷中
嗣宗非達者徒解哭途窮

時道以士賓皆將出江上故第五及之

追寄槐山趙使君

出宰每山水使君看亦仙
行裝有隨鶴治理用烹鮮
吏牒林中几人烟峽裏田
春風四郡興預滿下江船

使君有書春來遍遊四郡山水順流而下云

臘月

臘月看看亦已闌窮居妻子鮮情歡衰年得病仍爲
崇凶歲謀生更覺難落日歸雲千樹黑近山多雪一
村寒烏鴉似識行藏理倦翮投林各自安

此意

去年曾此意今日欲如何老罷猶豪氣情來只短歌
臨溪草屋小抱郭雪山多可惜良時節和愁每浪過

立春

此老今年了丙申還從雪裏又迎春飛騰不復平生
志衰病空餘半死身獨與溪山爲主客且將花鳥作
經綸東風亦自多神力吹到柴門欲起人

除夜

臘退乾坤春復生窮居何以作新正
習貧妻子曾無語垂老詩書尚有情
山雪欲消三逕出澗梅初發一枝橫
燈明夜永還深臥彷彿前年爆竹聲

卽事

丁酉

乘春病欲起開戶問東風萬木輕
寒外孤峰淡靄中世應輕退士天或
念衰翁出谷多山鳥嚶鳴到處同
汝九以其官事非罪就理悲歎有作

薄宦徒添病入身此來縲紲亦何因
山田一畝寧無地恨不當時作野人

病懷

病臥經旬又閉門寸心銷盡骨猶存
飲池可得長桑術鑑井惟須子祀
論千嶂宿雲開霧旭一園春雨潤
枯根山禽有舌嘲吾懶每到花時
不出村

其二

天氣暄寒太不調病懷深閉只蕭條
猶嫌服藥中和損獨喜看書外慮消
萬事可憐衰朽物百年虛負
聖明朝臨溪老柳無情臥耻向東風
學楚腰

其三

此老安能刺促行人間卻由少夷庚
自知傲骨非當

世不惜才名與後生獨臥青山無限色忽聞黃鳥爲
誰鳴武溪白石題詩處每歲東風傷我情

用少陵韻

步隨芳草出柴扉春意回看滿翠微已覺人烟過寒
食正憐天氣可新衣東風問酒誰家好北郭尋花舊
伴稀多謝飛來雙燕子每年如約不曾違

雨中遣興

春雨冥濛滿一溪水流終日繞村西捲簾柳絮時吹
入隔屋花枝半壓低已判到門無舊客尚能沽酒有
貧妻茶爐筆架從霑濕隱几閑眠過午雞

雨後

夜雨西峰濕斷霞
清明日出近山家
一溪碧漲溶溶水
千樹香生淡淡花
久病只應驚節候
新詩不敢弄韶華
可憐倚杖柴門外
白髮當風任爾斜

寄惠卿

白岳峰頭雲氣生
三清洞口雨新晴
隣家酒熟花初發
老子詩成鳥亦鳴
此世幾何餘短髮
今春欲盡更多情
興來日極連天草
安得携君一出城

金莘老與安國賓朴士賓金士修鄭惠卿鄭淵卿携酒來過李一源追至用潘溪韻共賦

溪流與人意萬古活無停獨喜來諸子誰知有此亭
杏花一雨白山色四隣青寂寞常高臥吾今出戶庭

其二

老筆何妨廢春杯不可停相看非俗物半隱此吾亭
坐睡孤峰近行歌萬木青乃知無事者真樂在門庭
朝來獨坐悵然用亭韻遣懷

昨日看花客滿亭朝來花落但空庭出門垂柳欲誰
折款枕流鶯堪獨聽世事如春亦無賴人生有酒不
須醒去年登陟今能否北望三峰天半青

太僕李主簿遣騎邀余與金莘老安國賓朴士

賓金士修鄭惠卿鄭潤卿登君子亭呼韻共賦
署裏還清境孤亭俯一池却從調馬暇聊作賞花期
白日波涵定微風柳起遲老夫寧易出徒爲此芳時
贈李太僕

子猷不記馬微官乃其跡邈矣高人情外滑中自適
看君池上亭白日坐岸幘眷茲芳辰邁酒聚詞客
遙山已先我半面出空碧柳色滿一塘春水動几席
風花亦有意吹我兩鬢白人老易爲悲物華尤可惜
願君賦餘春聊以永今夕

遣興

昨日多風今日陰春愁坐與落花深閉門却似禪家
境對酒還生俠客心醉後不須嗟白髮死前多是惜
黃金清談晉代論人物何得山王並竹林

寄金川洪使君

吾土傷春盡羈心更若何一官霜鬢短殘縣野花多
坐已瓜期滿歸須麥限過碧雲猶在望黃鳥自爲歌
卽事

病後仍無事山齋日復遲水流閑坐外花落獨眠時
老境還生興良辰不廢詩此中聊自樂何必少年期
春盡日入三清洞

憑高一舒嘯滿目是青山落日如相待孤雲亦不還
春辭白髮外詩在綠陰間但得千杯飲浮生萬事閑
果川旅舍

不肯比隣往胡爲此地眠投人豈高計去國是荒年
倦馬依茅店孤燈照麥田正愁南路濶衰白犯風烟

水原道中

倚馬和殘睡悠悠度果川長亭廣州堠捷逕大津船
草色天相際雲陰野一偏行看掘菜女哀唱滿中田

永保亭

亭即忠
清水營

兩山橫海忽中開雷激鱗潮拍岸來地勢合吞諸島

嶼湖光平動一樓臺風生萬木鳴相應雨壓孤舟宿
未迴百尺危欄含落日翠翁於此昔徘徊

其二

千尋鐵壁聳蒼虬遂有孤亭壓上頭表裏關防山特
立西南天地水俱浮參差烟樹臨江寺滅沒風帆踣
海舟入夜月明猶指點半潮雙島似眠鷗

其三

勝處登臨似有期湖山滿目可吾詩樓高更欲添千
尺海濶猶嫌限一涯草樹氣濃吹白雨魚龍影動倒
朱旗古人不與同酣興盡角清樽便作悲

其四

永保亭開節度營山彎水抱一孤城海風力舉樓船
壯朝日光搖劍戟明遠目不勝隨鳥去新詩忽欲與
潮生元戎斗酒還留客醉倚高牙看閱兵

其五

偶然騎馬出湖關麥熟南州客未還獨愛高樓來海
上却携諸子坐雲間青天盡處爲何水黑霧開時見
數山我欲乘桴從此去將身不復踏塵寰

其六

凌虛閣勢欲飛超影落湖心虛動搖鰲極平臨三島

出龍宮俯視百靈朝海防得地真形勝漢使留題不

寂寥恠爾漁童短於鵠輕舟突去日乘潮

凌虛閣即亭西南偏

壁上有明使詩板

其七

自覺平生氣激昂登高一嘯海天長曠懷直欲包飛
動老眼還能破混茫北出峰巒知百濟東來舟楫見
扶桑腥鱗醜甲紛無數獨向波間採夜光

拱北樓

錦水橫天地危樓俯杳茫關山望不極客子意何長
百濟餘荒野孤舟送夕陽猶看駐輦處雙樹向先

王

樓即公州雙樹山城門樓也
甲子適變仁廟駐輦于此

還家作口號

丈夫在家常鬱鬱客遊更思家居逸今年偶作湖海
遊洪陽縣裏十日留金樽清酒膾鯪魚使君愛客真
風流且復歸來臥一室高歌短髮俱蕭瑟獨有永保
亭上詩湖山作我囊中物傍人大笑此迂拙但覺胸
中氣嘖兀

雨中遣興

山雨孤花落蕭然臥北林收來湖海氣更作薜蘿心
隱几吾將老垂簾日復深荒庭有草樹禽鳥集涼陰

閑居

北山何多雨庭草日以積豈無子桑病頗喜絕塵客
幽花明一樹鳥語聞晝寂獨酌一杯酒微醺誦羲易
寄三淵

積雨林中臥一床鬢毛蕭颯早迎涼知君亦有還山
思未必悲秋似我長

涼風

涼風來處每西林寂寞荒園近岳陰暮境形容唯伏
枕高秋物色更傷心疎星出嶺鳥歸盡落葉滿庭虫
語深我有胸中千古事一杯澆下一長吟

直中遣興

吏散庭空夕雀喧
西山餘照北山昏
情緣對景時招
客身若無官只閉門
獨夜徘徊星在閣
深秋愁思菊
當樽逍遙賴有南華老
曠世神交寄漆園

時余讀莊子

洪君則李一源
以余被彈並駕來
唁贈詩次韻
直道何妨黜微才
不合官可憐
松菊色還我
本居寒
出郭

入城何窄
出城寬三角
諸峰放眼看
獨愛文殊最高
頂居僧常臥
不知寒

夜坐太古碑下

空山夜寂坐岩峴意與秋天共泐
寥清徹萬峰聞擊磬白翻西海見
生潮罷官却喜閑行得依佛方知
妄念消手撫塔碑苔半蝕牧翁文
字記前朝

巴陵曉行

曉柝欲停城角悲明星客子似相
期江湖莽蕩孤舟去天地蕭條百
草衰萬事風塵堪一涕千秋豪傑
不同時摩挲砥柱空遺跡歲暮西
方有所思

砥柱二字
即明使筆

寄安國賓

此別終成抱玉歸英雄從古事多
違百年妻子還茅屋十月風霜一
布衣落木鳴梭寒更急空山拾橡
歲

仍饑讀書且喜淵龍近好就玄珠借夜輝

溪南夜歸

孤月懸空靜霜溪澈底清沙光分犬立樹影帶人行
一氣寒初至三年病亦生湛浮此里巷無事卽身輕
卽事

老樹多奇色嵯峨上拂雲幽居方歲晏獨坐每宵分
暝鳥依林定寒砧隔屋聞燈前萬事集小酌不成醺
寄三淵

聞君歸臥白雲山叢桂山深誰與攀覲破百家雙眼
大踏回千界一身閑霜高獸伏寒林下月小泉鳴空

峽間縱欲乞言那可得青牛已矣出函關

同安國賓對菊作用杜韻

臥病秋風亦送回柴門寂寞不曾開青山滿眼吾今
老黃菊多情客又來正欲詩成仍得酒且須身健可
登臺春天草木霜凋盡珍重孤芳爾莫哀

時潤卿
送酒

雙栢堂夜話呼韻

短髮何由駐歲華從君猶喜覓梅花身閑獨有清真
趣客少元非暖熱家暝郭點燈深吠犬高松落雪暗
翻鴉相過不自迷三逕只是南涯與北涯

曉起卽事遣興

冬夜稜稜天雪霜山齋獨臥夢難長隔隣寒杵猶鳴
響將曉殘星各動芒服藥正如驅大盜讀書猶似對
先王百憂燈下三杯酒千古英雄一激昂

題魚躍龍門圖

養成頭角煥金鱗一躍龍門便有神雲雨得時方變
化向來誰識本魚身

竹西與諸子賞梅呼韻

各有歲暮意徘徊憐此梅已看兼雪落猶喜續花開
直到舉明燭何須辭滿杯殘葩與短髮且駐莫相催
金道以與其從弟士修兄弟及其子若孫爲故

宮采艾之遊余亦赴焉李正郎一源追至余於
酒後作故宮春遊歌以屬諸子和之 戊戌

邇來百憂如合圍不肯放我出山扉今朝睡起黃鳥
鳴忽有東風吹我衣此君軒下招數子宿約行尋故
宮裏版曹走馬亦奇氣撥却簿書能到此是時春寒
尚餘雪新綠流澌半池水平坡列藉坐向陽白飯青
艾柔且香更有春酒琥珀光一飲累十觴發我老興
狂酒酣撫古槐閱歷三百秋玉柱經火苔半黑此是
當時慶會樓樓上 君王樓下民至今聖澤猶在人
嗚呼太平不親見寂寥廢苑空殘春且待花開可復

來蕭條此生哀賤臣

正月晦夜雨

春陰苦多雨滴瀝小燈前正月餘今夜衰翁甚去年
獨吟山悄悄幽意水涓涓似欲催花事東風爾亦顛
有感

故交今已盡閑處輒尋思尚有論心地終無會面期
暮途餘獨立春日更深悲默默殘生事情來祇自知
鄭孝源贈詩大有歎惜悲慨之意感而和之次
其韻

食蓼虫相似焉知有此窮身從今世屈志許古人同

春意千花得天機百鳥通生涯君莫問但畏酒尊空
獨立

東風草木不知寒春意園中倚杖看愛爾孤峰天半
立却從危處着身安

送金生德興赴燕

老我徒雙眼乾坤一井蛙今君卽萬里此地亦中華
古塞唯懸月春山少發花秦城虛突兀日暮有哀笳

送金納言赴燕

征西車馬近相望又送君行欲出疆爲輟皂囊充使
价却將香幣問戎王地臨秦塞何多險日到遼天亦

少光別意暗隨春草去四千里路一茫茫

老去

老去惜佳節閉門還此情山禽雨中語春草水邊生
政念親朋會仍思勝地行西軒已易主隣笛爲誰橫
出門無所適

出門無所適天地此身孤萬事入危涕東風吹白鬚
吾寧詠貧士人亦耻凡夫蒼蕩看今古殘生海一隅
春日感懷

白髮與春草相看朝暮生無人道此意獨遶樹邊行
惜春歌贈朴士賓

去歲東風一夢過今日東風奈若何東風不與我相
好白髮更覺傷春多春來春去能幾時少年一失難
再追君今置酒要我飲老夫此意君應知同來數子
且安坐杏花枝頭未全墮但將沉醉酬佳節來日大
難不關我

睡起遣興

睡起簾垂山日斜寂無車馬到貧家呼兒却掃庭前
地不遣塵埃汚落花

李一源朴士賓見過留詩和之

昨日西園今北林諸君坐莫畏春陰杏花對客不肯

落芳草閉門相與深病起壺觴猶在眼閑來節物只關心我今萬事看如土頭上烏紗已脫簪

訪金士修

一室得千古羲皇還此中客來唯白日人臥自微風
道以窮時見心於靜處通幽禽尚春意並坐啄殘紅

簡朴士賓

吾居谷口子山根雞犬人烟亦一村岳色平分與鳥
几春流穩送到柴門老能杖屨猶身健貧保詩書卽
道存政想此時同此意臥看松月照孤樽

恕菴申學士再暮日過綠槐檻記感

寄影人間老病催哭君如昨再暮回架書獨與孤兒
守庭樹還迎舊客來廓落那堪空撫跡蕭條不欲更
論才此生已覺無餘淚隣笛虛橫日暮哀

書司馬相如傳

凌雲奇氣故棲遑一曲瑤琴弄鳳凰自有文君作知
已何須詞賦媚君王

謁道峰書院退坐霽月樓有作

正氣所磅礴山川清且幽士爭瞻廟貌吾欲問源頭
禮樂回三代乾坤拄一樓堪嗟大石隕塞斷水分流

數年前山石爲霖雨所墜轉填塞溪
澗之中水流改勢頗失舊日勝槩云

哭俊孫

有藥不復勸送爾爲此行胡不且斯須臨發只吞聲
吾女獨爾母吾孫獨爾兄得爾更喜甚爰以俊爲名
昂昂大宛駒足無千里程愛至望亦深晨夕祝長成
丁寧他日意吾墓免人耕篋有太史書而豈道側橫
嗟爾今已矣我何忍爲情不怨早夭爾但恨吾久生
無身痛卽已幾何還相迎早知髑髏樂無殤亦無彭

題寓居屋壁

邈矣唐虞萬古天匏瓜一繫海東偏雄心獨未忘千
里雙眼空教送百年寂寂閉門窮巷裏悠悠行跡衆

人邊低頭且聽兒童笑短髮如眉不滿顛

其二

小窻衣被接冥濛身臥經旬積雨中一澗夜喧生急
水衆峰朝出得晴空蓬蒿憲室居何陋金石商歌道
未窮濯熱不須思玉井自知方寸有清風

夕臥

萬里心長臥一床閑中日月也猶忙圖書錯落甕盎
內几杖欹斜雞犬傍岳近雲雷頻作雨庭虛草樹暗
生涼今宵似有欲晴意天面微青星出光

移居

舉國同飢疫嗚呼甚亂離澤鴻何所集隰楚自無
旅泊中宵靜商歌萬木悲相依且骨肉不敢恨
自寓還家有感作

人生若浮萍着處孰非寓去家亦無幾撫跡已成故
庭前老朱杏昔爾行繞樹今還不復見唯有草間路
出東門抵羣島作

一出終羈旅回瞻尚國門五噫徒有曲三黜亦無言
癘後郊原臭霖餘并落昏操舟更誰力此島半空村
舟發東湖向上游遣興

有口從人食男兒絕可憐遲遲出郭馬漠漠上江船

亂石憊牛峽孤臺弔遶川乾坤亦容我一笑白鷗前
夜與驪牧趙令公別乘小艇向甕寺投宿
南樓別意悵回橈甕寺東臺路且遙隔岸疎鍾來半
夜叅雲古栢自前朝江從絕峽爭奔放月與孤舟一
動搖到寺不知天欲曙塔顛巢鶴響層飆

可興

可興站前江更深長洲葭菼岸楓林舟船一道衝高
浪霧雨羣峰接太陰過後峽門猶細膽臥來篷底亦
遐心琴臺此去歌悲壯極目烟波橫古今

中原旅懷

悲歌蕭瑟動江關。天地東南嶺峽間。半夜鬼神來繞水。高秋風雨到龍山。猪肝食盡那無累。鴈足書傳且未還。欲向青娥借明鏡。却愁嘲我可憎顏。借鏡時實有是事

其二

萬里西風吹白頭。故園今夜亦悲秋。病軀厭作中原客。歸思忙於下瀨舟。木落虫鳴俱悄悄。天高斗轉更悠悠。遙知兒女燈前語。開篋還應檢弊裘。

其三

仲秋餘熱尚熏天。涼意今朝稍灑然。但道客中難遣日。不知愁裏暗銷年。屯雲古峽無常雨。喬木荒城落日

後蟬欲向西風傳一札行人又發下江船

其四

城頭夜色悄吟笳仰視中天北斗斜極浦點燈江客舫孤村鳴杵峽人家空庭步處聞鴻鴈故國來時種菊花不可久留身亦病一帆西下杳雲沙

晚泊彈琴臺下

彈琴臺下野茫茫草短沙平古戰場徒搏虎狼當鼓吻却投魚鼈與充腸扁舟客臥秋天迥廢壘螢飛峽夜荒欲吊將軍一杯酒撻川流水爲誰忙

舟過驪江神勒寺

即驪寺

輕舟一百里忽已下驪州野曠衆山出江明孤塔浮
依然前夜宿倦矣此身遊無限東臺月何人與倚樓

去時身驪牧趙令公夜語別
去宿於此寺今來公已歸矣

舟行連日值雨風浪不順促櫓過興元夕抵驪
江宿曉起又行作長歌遣興

去時風雨來時雨我行畏風如畏虎忠州向西三百
里惡灘險瀨誰能數黑雲多自西北起衆山相糾半
吞吐槎牙亂石侔劍戟風浪與之橫作怒賴有長年
誇手捷側立船舷憂鳴觴酣歌踏浪視平地忽過興
元到驪浦東臺白塔欲迎人湧出龍宮若飛舞繫纜

暝尋江岸黑漁火青楓隱數戶喜逢詞客談風月更
與田翁問農圃臥聞草虫眠不得曉起隣船已打鼓
逆風五兩又東指大灘雲雷忽改觀乃知愁雨又愁
風顧我此行奚所取相如鼓琴笑鳳凰禰衡落筆驚
鸚鵡丈夫雖云遠遊樂萬事不如安吾土北山之下
三間屋顏氏簞瓢足千古

上峽歌

莫說瞿塘石無如此峽難風波不可上九十九回灘
下峽歌

舟下千重峽驪江勢稍平東風方有力一日漢陽城

大灘

蓬底還平地危灘臥自過方知利舟楫今幸免風波
落日楊根盡秋山斗尾多吾非楚客意不用采菱歌
舟中望見石湖亭有感

秋水猶明眼孤亭客自知宛其同倚處悵我獨過時
富貴渾如夢江山不復詩此心懸樹杪留與夕陽遲
燾島舟夜

獨枕菰蒲影危檣傍岸橫大江孤月動遙夜百虫鳴
汎汎身如寄亭亭睡未成重城隔鍾漏猶是戀家情

李重叔挽

君有雄文早擅場使居何地不超驤周才小試桐鄉吏積毀難容戶部郎萬事回看雙鬢短高樓一臥大江長姓名獨掛扶桑日留作蠻兒口齒香

清心亭贈金振汝

善寫真

傳神學自涓洲翁一笑相看山雨中落木流泉無限意只應難寫是秋風

簷間

昨汝送我處我今坐憶汝獨有床下虫此情如欲語奉送金大諫出宰安邊

一臥殊方戀闕多鈞天消息問如何詩成却與佳

人唱彷彿當年水調歌

杜村

避地仍無食從人遂有歸野雲迎雪鬢山澗濯塵衣
社酒來相勸秋花坐不違松間微月出照見一柴扉

其二

深秋雲水白野色際寒空落日牛羊下荒村樹木中
鳴梭分夜火墻戶備霜風蟋蟀悲徂歲詩人此意同

其三

暮歸穿落葉山路入孤村野曠初收稻林昏半掩門
孤燈虫語壁小雨菊花樽萬事當今世田家獨樂存

其四

地作千金堰人瞻下馬陵
高齋臥聞雨落葉亂吹燈
意愜還非客身輕却似僧
朝來起嗽齒寒澗欲生冰

其五

澗谷含餘照寒泉葉底鳴
已看山鳥入獨有野人行
力穡還供稅逃虛却諱名
應知百胡廣不及一淵明

其六

野水還生暝霜楓欲了
秋寒來多病物靜處亦羈愁
天地容雙鬢詩書借一樓
夜闌猶臥語山月滿衾裯

其七

此世元爲客隨緣且可居獨垂中夜淚纔得小孫書
短景孤吟外寒花一醉餘滄江萬里濶潑潑彼游魚

其八

慘淡秋冬際孤村更悄然四山渾落木中谷只鳴泉
樵子時行語田翁少醉眠王畿得河潤却恠每無年

其九

獨夜步檐星滿天此身爲客又今年愁看山月不相
待醉對菊花還可憐早識王通空獻策誰言許汜誤
求田深秋水國寒將閉萬里魚龍臥寂然

其十

四山多木暝蒼蒼秋盡孤村歲又荒歸鳥亦應知落日
蟄虫先自避寒霜閑蹤不必金門隱感興還從草
野長始識古人同此意哀歌唱斷北風涼

其十一

山閣經秋閉寂寥臥聞霜葉下蕭蕭林鳥忽起何風
急江月孤懸此夜遙歲儉荒田稀菽粟天寒空谷散
漁樵祇應城郭多人事歸夢還驚到洛橋

其十二

霜天初月細如鉤掛在蒼山西北樓正憶故園同悵
望却憐叢桂更淹留乾坤獨下樽前淚江漢虛橫夢

裏舟我愛老農真可學一生衣食自爲謀

其十三

鴉宿霜楓犬臥扉傍山籬落四隣稀夜深月黑林間
路人語時聞納稅歸

其十四

霜杵孤鳴山月懸野人相語又荒年不知獲稻誰多
少無病東隣早種田

其十五

丈夫不自少邈焉志孤奇但使聞道早古人亦可期
苟不策高足服力宜東菑顧余兩無成窮老未免飢

偶來田畝間聊與老農嬉麋鹿自天性食草野水涯
老樵行

蒼山古櫟交鴨脚九月繁霜草木落短衣葛屨者誰
子獨行山谷收枯蘗暮歸賣樵晨復出手足病瘵心
自樂五侯玉房熏獸炭北風不敢穿羅幕君莫笑老
樵長在山回首人間幾桑榆

北風行

北風夜起翻江漢橫江怒濤拍兩岸冠岳峰上飛雪
滿銅雀渡頭行人斷南村老翁泣且言秋雨十日天
陰暄今年毒疫良半劉野田殘穀濕不收祝融玄冥

鬱相聞陰陽轆葛氣倒流廣陵客子悲短衣仰視北
斗歌式微鴻鴈嗷嗷大澤寒病翅不敢橫雲飛長缺
歸來歲已闌北風雨雪行路難

獨坐溪石上

霜高木落蕭初晨澗水流鳴不見人獨坐此間心境
靜一峰相對會精神

與孝源野行

緩步不知遠延緣草間去孤雲與野水引我行相語

東臯

田翁留客飲出門月已高牛羊亦知夕相與下東臯

牛坡晚歸

遙山接天盡落石見村稀獨有騎牛子荒陂橫處歸
果川途中


既冬穡事畢四野何廓然騎驢白髮翁細路緣荒阡
依依指遠村稍過喬木前羣山悄相向短景淒霜天
逢人試借問行者各有牽不知誰最忙萬古此途邊
狐嶺途中

果川北去穿狐嶺匹馬短童何苦辛獨往不忘田舍
志相逢多笑布衣身夕陽冉冉如歸客野水悠悠欲
送人來日渡江非我意更將雙眼入風塵

別社村

豈無才力住意奈此歸思切愛爾齋舍幽今朝悵言別
流目眷林泉存心學農岱新杭持作飯落葉充煖埃
吟咏叅園書道情殊未畢鳥雀托深枝羣居不相失
感歎有餘懷更指山中雪

柳下集卷之六





集

下

柳

三